

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O IZMJENI ZAKONA O ZAŠTITI I POSTUPANJU SA DJECOM I
MALOLJETNICIMA U KRIVIČNOM POSTUPKU**

Sarajevo, 2019. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Postupajući u smislu odredaba člana 26. Poslovnika o radu Vlade Federacije Bosne i Hercegovine - Prečišćeni tekst („Službene novine Federacije BiH“, br. 6/10, 37/10 i 62/10), predlažemo donošenje Zakona o izmjeni Zakona o zaštiti i postupanju sa djecom i maloljetnicima u krivičnom postupku po skraćenom postupku.

Kao osnovni razlog za donošenje ovog zakona po skraćenom postupku ističemo da se u konkretnom slučaju ne radi o složenom i obimnom zakonu te da su u tom smislu ispunjeni uslovi iz člana 172. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, broj 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“ br. 27/03 i 21/09).

Z A K O N
O IZMJENI ZAKONA O ZAŠTITI I POSTUPANJU SA DJECOM I
MALOLJETNICIMA U KRIVIČNOM POSTUPKU

Član 1.

U Zakonu o zaštiti i postupanju sa djecom i maloljetnicima u krivičnom postupku („Službene novine Federacije BiH“, broj 7/14), u članu 130. stav (1) mijenja se i glasi:

„(1)Troškovi izvršenja krivičnih sankcija prema maloljetniku padaju na teret budžeta osnivača ustanove u kojoj se izvršava krivična sankcija.“

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E
ZAKONA O IZMJENI ZAKONA O ZAŠTITI I POSTUPANJU SA DJECOM I
MALOLJETNICIMA U KRIVIČNOM POSTUPKU

I. – USTAVNOPRAVNI OSNOV ZA DONOŠENJE ZAKONA

Ustavni osnov za donošenje navedenog zakona sadržan je u odredbi člana IV.C.3. Ustava Federacije Bosne i Hercegovine, kojom je predviđeno da pravila postupka koja su potrebna da se osigura jednakost u postupanju, kao i osnovni principi pravičnosti u postupcima pred sudovima uredit će se zakonima Federacije. Polazeći od činjenice da se ovim zakonom uređuju pravila krivičnog postupka pred sudovima u Federaciji navedena ustavna odredba predstavlja ustavni osnov za njegovo donošenje, pa je na osnovu člana IV.A.20.(1) d) Ustava Federacije, Parlament Federacije Bosne i Hercegovine nadležan za donošenje ovog zakona.

II. – RAZLOZI ZA DONOŠENJE ZAKONA

Postupajući u skladu sa tačkom 2. Zaključka Vlade Federacije Bosne i Hercegovine V.broj: 471/2018 od 12.04.2018. godine Federalno ministarstvo pravde pripremilo je izmjenu člana 130. stav (1) Zakona o zaštiti i postupanju sa djecom i maloljetnicima u krivičnom postupku.

III. – OBRAZLOŽENJE POJEDINIH ZAKONSKIH RJEŠENJA

Članom 1. ovog zakonskog prijedloga mijenja se član 130. stav (1) navedenog Zakona na način da troškovi izvršenja krivičnih sankcija prema maloljetniku padaju na teret budžeta osnivača ustanove u kojoj se izvršava krivična sankcija. Naime, aktuelnom odredbom člana 130. stav (1) navedenog zakona propisano je da troškovi izvršenja krivičnih sankcija prema maloljetnicima padaju na teret Budžeta Federacije Bosne i Hercegovine.

Međutim, uzimajući u obzir činjenicu da je primjene navedene odredbe zakona od dana njegovog stupanja na snagu naišla na različita tumačenja nadležnih institucija u smislu ko snosi troškove izvršenja odgojne mjere kao i činjenicu da se odgojne mjere propisane ovim zakonom izvršavaju u ustanovama koje su osnovane od strane kantona i koje se finansiraju iz budžeta kantona neophodno je prilagoditi navedenu odredbu te izvršenje odgojne mjere kao i njene troškove uskladiti sa nadležnošću Federacije odnosno kantona.

IV. - FINANSIJSKA SREDSTVA

Za provođenje ovog zakona neće biti potrebno izdvojiti dodatna finansijska sredstva iz Budžeta Federacije Bosne i Hercegovine.

ODREDBA ZAKONA KOJA SE MIJENJA
Zakon o zaštiti i postupanju sa djecom i maloljetnicima u krivičnom postupku
(„Službene novine Federacije BiH“, broj 7/14)

Član 130.
Troškovi izvršenja krivičnih sankcija

(1) Troškovi izvršenja krivičnih sankcija prema maloljetniku padaju na teret budžeta Federacije Bosne i Hercegovine.

(2) Roditelj, usvojitelj ili staratelj maloljetnika, odnosno druga osoba koja je prema zakonu obavezana izdržavati maloljetnika, kao i maloljetnik koji ima prihode ili imovinu, po pravilu, nisu dužni, ali mogu snositi dio troškova izvršenja posebnih obaveza, mjera pojačanog nadzora u drugoj porodici, upućivanja u odgojnu ustanovu, upućivanja u odgojno-popravni dom i kazne maloljetničkog zatvora.

(3) O visini podmirenja dijela troškova ishrane i zadovoljavanja drugih ličnih potreba maloljetnika odlučuje sud na prijedlog osoba iz stava (2) ovog člana. Ovi troškovi mogu biti u visini iznosa minimalne plaće na nivou Federacije Bosne i Hercegovine koju utvrđuje Federalni zavod za statistiku za mjesec koji prethodi mjesecu odlučivanja ili u visini koju predloži podnositelj prijedloga. U ovom slučaju sud će najprije donijeti odluku o izricanju krivične sankcije, a nakon toga nastavlja postupak za odlučivanje o podmirenju dijela troškova i o tome donosi posebno rješenje.